

政
呈

中
華
國
本

之
研
究
(三)

選兵制度

中華國本之研究目次

鄉正制度	一
教育制度	二
選兵制度	三
農桑計畫	四
工商計畫	五
交通計畫	六
軍事計畫	七
外交計畫	八
國用計畫	九
禮教問題	十
刑罰問題	十一
選舉問題	十二
衛生問題	十三



A541 212 0018 85028

中華國本之研究 (三)

含山胡春林

選兵制度

立國於大地，必有其一國之精神，始足左右世界，而不爲人所蔑視。兵者非國之精神乎。五洲大通，強鄰逼處，火車輪船，風馳電駛，世界多事，方興未艾。國無良好兵制，即國無強健精神。國無強健之精神，即難謀國際之平等。語云兵凶戰危，吾謂得其道，雖日日言兵，日日言戰，斷不以兵而害安寧，斷不以戰而傷元氣。譬之人然，必四肢健全，而後身體有自由之樂。兵之於國，猶人之有四肢也。

夫以我國與世界各國生關係，不過數十年耳。而藩屬，則越南奪於法，緬甸滅於英，琉球台灣朝鮮相繼割併於日。港要，則日俄於旅順大連灣，英於香港九龍威海衛，德於膠州灣，法於廣州灣，或租借，或割畀，在我幾全失其險要。而滿蒙藏三邊，英謀於西，日謀於東，俄謀於北，正未有已極。居今之世，而欲與世界強譎諸邦，高談公理，何殊對虎談經。而此強譎諸邦，其土地其人民，又恒不及我十分一二之密接，在我正不必自餒。

要在有以大振全國之精神，使皆明於國家之真諦，與外禍之洊迫。不偷旦夕之安，同抱遠大之務。以捍衛國家者，維持大亞。即以維持大亞者，維持世界和平。我國地位所在，非不可爲。果其及是時也，發憤自強。安知二十世紀之天地，非我種族突飛之天地乎。

國之興替，全恃人爲。人強則國強，人弱則國弱。人不人則國亡。天演公例，此不必諱，而亦無容諱者也。自強之道，則莫若速行選兵制度於全國。其手續視徵兵爲易從事，視募兵爲較安全。不慕舉國皆兵之名，而有舉國可兵之實。便何如之，急又孰加於此。請詳其制。

(二) 兵數及部勒。 民國統一，總東西南北，內外蒙古，前後藏，滿洲，新疆，青海，內部，重要省域，計二十有八，固相倚爲命者也。譬如欲需兵百萬，爲戰守之備。計每省域平均應各出兵三萬五千七百十四名。僕皖人也，請就皖爲先例，借箸籌之。皖省號稱六十縣，以此三萬五千七百十四名兵額，再平均計之，每縣約出兵五百九十五名。各縣

合城鄉自治區，再平均計之，一縣當不下十區，以五百九十五名攤計，各自治區應出兵五十九名。此五十九名，或一期或二期三期選足。選時即由各區自治員紳負責。或招考，或保舉，或按戶籍酌派。選舉列名由鄉正報告知事，轉呈道省署備案。自治員紳於此項選兵，耳目既周，品類尤悉。以一區幾何萬人，所選僅此數，當不乏赳赳武夫，出爲干城之寄者。以視倉猝召募，憂戚不相關，其相去奚啻霄壤。

至部勒即可準此爲定則。由一區選出五十九名者，訓練成軍之後，即就其中選一二候補排長。合一縣十區五百九十五名者，又就其中選一二候補連長。合一省六十縣三萬五千七百十四名者，再就其中選出數個候補營長。鞭策之方，在神鼓舞。主兵如此，特重兵亦可就此主兵分別練習。推之他省域，一例進行。雖百萬新師，咨嗟立集。既有節制，又易親愛。以資緩急，夫復何虞。既足促進社會之尙武，又可聯絡地方聲氣，引起人民國家之觀念。有事不難交奮，無事各反其區。招集易，遣散尤易。有利無害，此其近矣。

(二) 兵餉及器械。

披覽我國兵史，恆少籌餉良法。且以餉失敗者，後先相望。尤以

今日籌餉受窘，滋甚。慮兵之乏餉，易生譁潰也。於是羅掘窮，而大受外債之束縛。而兵亦時有因餉不發，動萌亂象。此無他，國視兵如保傭，兵自視國如秦越。有餉靖亂，無餉肇亂，亦奚足怪。今爲握要之圖，莫如行就地籌餉之制。譬每名平均月以十元計，每區五十九名，應每月籌五百九十元，此款可就地方正稅雜稅，量地分撥。即交由自治員紳，按月給應選者家中供養。軍中每月只給普通獎洋一二元，以備零用。餉之盈絀，官卒皆可不計。如此室家既無內顧之憂，行伍自收感發之效。吾恐中人之家，將有求爲選兵而不可得者。若以地方款不易籌，再擬救劑之法，可由知事會同縣議會、鄉正、自治會，編一從軍信用餉票，分二角五角一元二元五元五種。按月照數發給，即由縣知事鄉正曉諭地方通用，以示優異。不獨可資鼓勵，且於國家經費，自不至因兵餉而廢他務。警耗頻聞，需兵孔亟，因噎廢食，坐困待斃，豈不拙耶。

至於器械，國家宜通盤籌算。可分縣備、省備、國備三種。按地審設大小製造廠所。軍服

照我國大陸習慣，靴鞋皆可用布製。輕捷便利，亦殊省費。衣褲尤當採用國產諸布葛綿帛。帽用布仿製。或取舊巾紮制亦可。一國有一國之精神與習慣。一國有一國之氣候與風俗。不必不同，而亦不必強同。即爲軍略計，亦可同其外形，不必同其物質。軍械軍服，務期按應選之數，加倍製備。此中運用，正自多方。質輕價廉，捨難從易。且注重國產製造，利農利工利商。而於地方亦多得興感之資，計孰便於此。如謂地方多兵多械，易啓內爭。須知今日世界趨勢，民族主義，將益發達。防小嫌而忽外禍，豈計之得。況同此國土，利害攸關，選兵成軍，上下有制。知事鄉正，督飭綦嚴，議會自治，監察有責。安事斷斷於寸豆，而忽遠大之務乎。

(三) 期限及選練。應選者以二年或三年爲作戰期。期滿如不願退伍者，視其勞績，分別退留。但令地方自治員紳，每年必招考或舉派一次。年齡以二十至三十五爲合格。照應選額，或半數，或三分之一二收錄，其得自治員紳公認者，予以待選證。凡有待選資格，即列名由鄉正送縣署，設法予以文字及操演諸項教練者，并照各區成數，

均派輪流，充住防巡防或鄉警之用。以資熟練，而策實效。輪流之期，或三月，或六月，可由各地方決定。果如此舉，則各地方需要之兵，皆出自各地，并可決其永無變亂之虞。行之十年，此退彼應，此應彼待，人人皆知兵，人人皆能兵。雖周官寓兵於農，泰東西徵兵之制，亦奚有加哉。而又何內憂外侮之足云。

(四) 旌獎及實邊。人心轉移，全資倡導。有以激之，匹夫可以成仁。可令各省各縣各區，各就其舊有之廟宇或公屋，改爲節義祠。凡應選入伍，或戰死立殊功者，爲之立像立牌，必按季由知事鄉正合地方自治員紳，率其家屬，及待選者，大舉祭奠，務極觀瞻之盛，并籌優予撫恤之典。如無戰死立殊功者，可就地方歷史上有節義應祭奠之先烈，將其節義事跡，詳爲說明，以供地方之模範。如是則人人有所觀感，自不難作其敢死決戰之心。且於風俗挽回亦易。欲以氣節鼓天下，捨此其奚以圖。

放觀大勢，我國存亡，將全視邊疆存亡爲存亡，而北東西三面尤爲緊急。欲大舉實邊，一面獎勵選兵行遠，勿以邊徼爲畏途。一面就招募舊有之兵，分別提選。効趙充國屯

田之計，以鞏邊圉而策久遠。可改各省督軍，爲各邊督軍。於國防大義，昭然若揭。亦最得軍分民治之道。夫以我國地勢，北高南下，北亢南濕。而民俗又北強於南。因之形勝常在北而不在南。則北東西三面之規畫，當如何汲汲也。

考我國史乘，歷代君主，多據北以有南，可以概見。元清入主，實亦地勢使然。我國幅員廣袤，三大川灌注國中，無高山峻嶺之關隔。一扼其形要，輒收建瓶之勢。非若歐西形格勢禁，山谿險固，縱橫交錯，各成形勢，有天然區畫，使易分治也。故合德法荷比諸國，尙不足與我幅員相埒，而彼卒不能相併者，地爲之也。

徵之春秋戰國四五百年間，雖羣雄角立，及秦遠交近攻之策定，韓魏折而入於秦，六國即相繼夷滅。厥後漢末四百餘年，唐末百餘年間，天下相競，亦旋分旋滅，卒不能并峙相抵抗，互演互進，而致釀近數百年帝王專制束縛之酷毒，使我國民相習文弱，乏對外各種之能力者，非以我國易統一不易分治，而坐此私天下者之野心，有以陷之哉。我國上下，誠就此點而熟思之，則北東西三面，寸疆尺土，皆有一髮牽而全身動之

勢。設防守險，豈不甚急。苟疎於遠圖，甌脫邊要，恐一縱卽逝，不特中夏不能安枕，卽任若何經營砥礪，終必不免淪胥。何也，無險可恃，無形勢可言也。

故實行選兵之制，復分舊有得勝之兵，大舉屯田，以保障滿蒙藏三面人權，以固邊陲，以抗外侮，實長治久安之計也。且於蒙藏改省之圖，亦可望有達到目的之一日。內部邊疆，相倚爲命，安可忽諸。

嘗謂舉行徵兵，需費浩繁，入手匪易。驚世駭俗，名實難副，最易惹列強之側視，於我國歷史相沿習慣，亦至多格格不入之患。而募兵流弊，又人人能言。審今之勢，積重難返，徵募俱困，一則遠不濟近，一則功不補患。而國防又日緊一日，待無可待。高瞻遠矚，擇便而行，選兵制度，言安能已。果其刻日行之，轉弱爲強，機會端在今日。請觀列強之勢，各不相下。五洲牛耳，正未知誰執。而巴爾幹問題，已惹起全歐之大戰。至與我最近者，莫如俄日。今德俄旣禍結，法雖與俄有盟，而俄之野心，亦法所至忌。英自阻俄印度洋之圖，至今常成相制之勢。雖偶結合，夫豈其情。日俄之戰，元氣兩傷。雖欲謀不利於我，

僞結協約。而日俄同爲君主，民權受壓已久。其國民慕我推翻專制之神，一躍而成共和偉大民國。俄之黨人，醞釀既久，感觸必多。改革之期，定不在遠。且其內政窳敗，時過於我。龐大無用，行將潰決，我何懼焉。日雖勝我而奪三韓，自安重根刺殺伊藤，懾日人之膽，震環球之心，雖謂此舉，韓之精神猶未亡可也。而謀刺監督，陰圖恢復，又時見告。則日之於韓，正多可慮。越韓以謀我，我固未易侮。韓亦豈真足恃耶。況其民黨醞釀亦久，又安能不有遠舉之一日耶。若就經濟而論，其窘更倍於我。土地不敷所入，時賴工商業之補助。而其工商業稍發達者，僅以我爲之尾閭。倘彼一失我助，立呈險象。任彼慘澹經營，苟我勢力稍漲，彼必懇親之不暇。又安敢引歐毒亞，苦我以自苦耶。美素持門羅主義，其愛和平與我同。眼光又非若他國之跼小。在前數年間，彼邦人士，於我淮海飢民，且有泱泱大國民風之崇許。近復深料將來，足以相與維持世界人道，增進世界道德者，非我莫屬。而足資我輔導者，即時賜不吝。統觀大勢，發憤爲雄，日俄多事之時，即我國奮興之日。美爲久遠計，不特經濟必思利亞陸爲尾閭。將來屏蔽，亦豈能外

此。美不能不防歐，美即不能不鞏亞，美即不能不助我。歐雖爲患，然地狹國多，勢均力敵。懷利相挾，言好豈情。外勢如此，至我所不可不知。乘此均勢機會，培我實力。假以十年，人智日進，兵復可用，誰謂我國尙可侮乎。

噫，國家恃兵爲精神，國民實造國家之原素。人方務本無之地以求逞，我撫其固有之地以圖強。得其道興也勃焉，失其道亡也忽焉。我炎黃神靈華胄，丁此五千年變局。要知世界不掀翻，必當爭亞陸之霍霍。身首可異處，豈能墮奴海之沉沉。兵制良否，興亡攸繫。徵募非宜，選兵最要。願與我五族憂國君子，急起圖之。



A541 212 0018 8502B

○著者出版書目

孔子倫理學之研究

中華國本之研究

青年責任教育之研究

孔子易哲學之人道研究

青年責任心之保持

堯舜禹
伊且尼 六大先哲合傳

學校管理精神談話

道術文批註

新民鑑

孔孟仁義救世說

國恥
演說 華胄棒喝

平民
小說 夢華胥

人道
小說 亞歐美長中少三男寓言

之中華國本
研究三選
兵制制度

著者
北京地安門
含山胡春林
燧庫十一號

印刷所
宣武門內西控馬椿
同文印書局
電話西局一九九七

中華民國八年
月
日

